

## **PERKEMBANGAN PERNIAGAAN KECIL MASYARAKAT DUSUN DI TAMU KOTA BELUD, SABAH, 1881-1940**

*Small Enterprise Development of Dusun Community at Tamu Kota Belud, Sabah, 1881-1940*

**MARRY LALIM<sup>1</sup>**

*Maktab Rendah Sains Mara Sandakan*

*E-mel: <sup>1</sup>marrylalim@yahoo.com*

*Dihantar: 19 Mei 2021/ Diterima: 20 Julai 2021*

### **Abstrak**

Artikel ini memfokuskan kepada perkembangan aktiviti perniagaan kecil yang dijalankan oleh masyarakat Dusun di Kota Belud semasa era zaman penjajahan British antara tahun 1881 sehingga tahun 1940. Penulisan artikel ini berdasarkan daripada beberapa sumber primer seperti fail sekretariat, laporan-laporan kerajaan, surat khabar, manakala sumber sekunder melalui buku. Secara amnya, kedatangan Syarikat Berpiagam Borneo Utara British (SBBUB) pada tahun 1881 banyak memberi perubahan terhadap pelbagai kehidupan masyarakat tempatan khususnya masyarakat Dusun sehingga mengubah corak kegiatan ekonomi, daripada bersifat sara diri kepada ekonomi perniagaan kecil di kawasan tamu Kota Belud. Sebelum kedatangan SBBUB ini, aktiviti penduduk Dusun adalah sara diri tanpa adanya campur tangan dengan pihak luar dan tidak banyak berinteraksi dengan masyarakat luar. Namun, transformasi ini mula berlaku ketika SBBUB cuba campur tangan dalam sistem ekonomi mereka dan turut mengambil alih pentadbiran di daerah tersebut. Dalam artikel ini, kegiatan perniagaan kecil masyarakat Dusun diberi perhatian utama dengan memfokuskan perkembangan kegiatan perniagaan mereka, faktor penglibatan dan kesan penglibatan SBBUB dalam aktiviti perniagaan kecil di Kota Belud. Kewujudan dan penglibatan masyarakat Dusun dalam aktiviti perniagaan kecil di Kota Belud juga dipengaruhi sifat masyarakat ini yang mementingkan kelangsungan hidup menyebabkan aktiviti perniagaan kecil ini terus berkembang pada ketika itu.

**Kata kunci:** Perniagaan kecil, Tempasuk, Kota Belud, masyarakat Dusun Kota Belud.

### **Abstract**

*This article focuses on the small business development activities carried out by the Dusun community at Kota Belud during the British colonial era between 1881 to 1940, before the Second World War. The writing of this article is based on several primary sources such as secretariat files, government reports, newspapers while secondary sources through books. In generally, the arrival of the British North Borneo Chartered Company (BNBCC) in 1881 giving changes to the various lives of Dusun communities, thus changing the pattern of economic activities from subsistence to small enterprise economy in Tamu Kota Belud. Prior to the arrival of the North Borneo Chartered Company (BNBCC), the activities of the Dusun community were self-sufficient without any interference with outside parties and did not interact much with the outside community. However, this transformation began to take place when the BNBCC tried to intervene in their economic system and also took over the administration in the district. BNBCC intervention has also changed the traditional economic activities of the Dusun community in Kota Belud and also brought about changes in various aspects of their lives. In this article, the small business enterprise activities of the Dusun community are given major attention by focusing on the development of their business activities, involvement factors and the impact of SBBUB involvement in small enterprise activities in Kota Belud. The lifestyles and participation of Dusun community in small business enterprise in Kota Belud is also influenced by the manner of living that emphasises on sustainability and these small enterprise activities to continue to be implemented.*

**Keywords:** *Small enterprise, Tempasuk, Kota Belud, Kota Belud Hamlet Community.*

### **Pengenalan**

Artikel ini membincangkan tentang sejarah perkembangan perniagaan kecil masyarakat Dusun Kota Belud semasa era penjajahan SBBUB dan sebelum berlakunya Perang Dunia Kedua, iaitu dalam lingkungan tahun 1881 sehingga tahun 1940. Objektif kajian ialah mengkaji perkembangan aktiviti kegiatan perniagaan kecil masyarakat Dusun di Kota Belud semasa era pentadbiran SBBUB. Kajian turut meneliti faktor penglibatan masyarakat Dusun dalam kegiatan ekonomi perniagaan kecil, sejarah awal penubuhan Tamu Kota Belud serta peranan pihak pentadbir tempatan dan pentadbir SBBUB dalam usaha menyokong penglibatan masyarakat tempatan.

Penulisan terawal yang membincangkan perkembangan aktiviti perniagaan kecil di Kota Belud ini dikupas oleh Owen Rutter (1929). Beliau ada menyatakan bahawa berlakunya satu kegiatan perniagaan kecil dalam

masyarakat tempatan di Tempasuk (yang kini dikenali sebagai Kota Belud) pada awal pagi.<sup>1</sup> Selain itu, Tina Rimmer (1999) menjelaskan bahawa tamu ini merupakan pasar terbuka dan menjadi tempat tumpuan masyarakat untuk berkumpul dan menjual barangan tempatan. Walaupun beliau hanya mengupas tentang tamu yang berada di daerah Tamparuli sahaja, tetapi beliau telah mengaitkan bahawa peniaga-peniaga kecil yang datang berniaga di tamu berkenaan adalah terdiri daripada masyarakat tempatan dari daerah-daerah berhampiran.<sup>2</sup> Chong Han San dan Low Ai Fuah (2008) turut menyokong pendapat sarjana ini dengan menyatakan tamu merupakan tempat untuk masyarakat tempatan menjual hasil produk masing-masing dan mereka akan menetapkan tarikh khas untuk berjumpa bagi menjalankan perniagaan kecil berkenaan. Penulis ini juga menyatakan bahawa pengunjung di tamu ini terdiri daripada penjual dan pengunjung dari pelbagai daerah lain dan beliau juga turut membincangkan tentang perkembangan secara ringkas tentang aktiviti di tamu pada masa lampau dan masa kini.<sup>3</sup> K.G Tregonning turut menyatakan bahawa tamu ini mempunyai peranan penting untuk aktiviti sosial masyarakat tempatan di Sabah<sup>4</sup> dan kenyataan beliau turut disokong oleh Johan M. Padasian yang menyatakan bahawa terdapat pelbagai kegiatan masyarakat tempatan di tamu selain daripada menjalankan perniagaan kecil.<sup>5</sup>

Tidak dinafikan bahawa telah banyak penulisan yang menyentuh tentang aktiviti perniagaan di tamu di Sabah. Namun, kupasan dalam penulisan lebih berbentuk umum dan menyentuh kepada seluruh masyarakat tempatan di Sabah. Malah, perbincangan khusus untuk penglibatan masyarakat Dusun dalam aktiviti perniagaan kecil di Tamu Kota Belud tidak pernah dilakukan. Oleh itu, artikel ini akan cuba mengupas dan mengetengahkan perkembangan aktiviti perniagaan kecil di Kota Belud khususnya menerusi penglibatan masyarakat Dusun di Kota Belud.

### **Lokasi Kawasan Kajian**

Lokasi bagi kajian ini adalah di daerah Kota Belud, Sabah yang terletak di pantai barat utara Sabah dengan keluasan 1385.6 km persegi.<sup>6</sup> Daerah ini merupakan salah sebuah daerah yang tertua di negeri Sabah yang pada awalnya lebih dikenali sebagai Tempasuk.



Dusun Tobilung menetap di pesisir pantai daerah ini. Kedua-dua masyarakat ini dapat dibezakan melalui loghat bahasa dan pakaian tradisional mereka. Selain itu, mereka juga boleh dibezakan melalui kawasan tempat tinggal kerana kedua-dua etnik ini tinggal secara berasingan iaitu di kawasan pedalaman dan pesisir pantai. Namun demikian, antara persamaan kedua-dua masyarakat ini adalah dari segi adat resam dan budaya. Kegiatan ekonomi pertanian dan penternakan merupakan sumber utama pendapatan masyarakat ini untuk menampung kehidupan mereka. Dalam konteks artikel ini, masyarakat Dusun difokuskan sebagai subjek utama untuk mengkaji perkembangan penglibatan mereka dalam perniagaan kecil.

Perniagaan kecil dalam konteks artikel ini adalah perniagaan yang dijalankan secara kecil-kecilan di Tamu Kota Belud. Terdapat pelbagai definisi diberikan kepada tamu. Tamu di negeri sabah merupakan sebuah pasar terbuka ataupun *open air market* dijalankan di sesuatu tempat yang sederhana besarnya.<sup>10</sup> Mereka biasanya menjalankan kegiatan perniagaan kecil ini di kawasan persimpangan jalan ataupun di tempat-tempat pertemuan seperti muara sungai untuk memudahkan mereka menjalankan kegiatan perniagaan ini. Kegiatan perniagaan di tamu merupakan satu perkara yang sangat dinantikan oleh penduduk tempatan dan tempoh yang diambil untuk membuat persiapan ke tamu tersebut adalah selama satu hari. Dalam konteks kajian ini, perniagaan kecil merujuk kepada kegiatan perniagaan yang dijalankan di tamu atau pasar yang terbuka.

### **Perkembangan Awal Perniagaan Kecil di Kota Belud**

Perkembangan kegiatan perdagangan di Kota Belud telah bermula sejak abad ke-15 lagi apabila terdapatnya hubungan perdagangan dengan kerajaan luar. Hubungan perdagangan pedagang dari luar ini bermula apabila Kerajaan Brunei menjalin hubungan perdagangan dengan kerajaan India, Arab dan China.<sup>11</sup> Kedatangan Islam di Brunei pada abad ke-10 menyebabkan Kerajaan Brunei semakin dikenali oleh pedagang-pedagang dari luar. Pedagang-pedagang ini biasanya akan singgah sebentar di sepanjang Teluk Brunei (sekarang dikenali sebagai selat Laut Selatan) dan berhenti di sepanjang kawasan muara sungai untuk membaiki kapal serta mendapatkan bekalan air. Kedudukan yang strategik di Kuala Abai sehingga ke Sungai Tempasuk yang mempunyai muara sungai yang dalam memudahkan kapal pedagang untuk berlabuh dan seterusnya menjalin hubungan perdagangan dengan masyarakat tempatan di sepanjang Sungai Tempasuk. Antara barangan tempatan yang menjadi pertukaran antara para pedagang dengan masyarakat tempatan adalah produk pertanian, rotan dan damar, manakala barangan dari China pula adalah seperti sutera, baju, tembikar dan barangan besi.<sup>12</sup>

Seterusnya, menjelang awal abad ke-18 dan 19-Masihi selaras dengan kepesatan perdagangan dan kekayaan sumber bumi di Sabah telah menarik kuasa Eropah seperti Belanda, Sepanyol dan Portugis untuk datang menjalankan kegiatan perdagangan di Sabah. Pada awalnya, hubungan perdagangan dengan kuasa luar ini adalah melalui Kerajaan Brunei, namun disebabkan kedudukan geografi kawasan di Kota Belud ini adalah di pesisir pantai, maka ia turut menarik minat kuasa-kuasa luar ini untuk menjalinkan hubungan perdagangan dengan masyarakat setempat. Kedudukan Sabah yang terletak di laluan perdagangan utama Asia Tenggara menyebabkan banyak kapal dagang yang terdiri daripada pedagang asing ke Sabah.<sup>13</sup> Malah, persaingan kuasa Eropah untuk menguasai laluan perdagangan telah menyebabkan kuasa Eropah seperti Sepanyol, Jerman, Belanda dan British cuba menaungi Sabah. Hal inilah yang berlaku dalam konteks negeri Sabah, setelah kedatangan William Clarke Cowie ke Sabah pada tahun 1876, akhirnya telah menyebabkan Sabah berada di bawah pentadbiran SBBUB.<sup>14</sup>

Sebelum pentadbiran Sabah diambil alih oleh SBBUB pada tahun 1881, kegiatan ekonomi masyarakat tempatan tertumpu kepada kegiatan sara diri skala kecil dan hasil pertanian bukan untuk dikomersialkan. Malah, kegiatan perniagaan kecil yang dilakukan oleh masyarakat tempatan hanya melibatkan pertukaran barangan (sistem barter) dengan penduduk di lingkungan sekitar kampung sahaja. Walaupun, terdapat hubungan antara masyarakat tempatan dengan para pedagang luar seperti pedagang Cina, Arab dan Brunei,<sup>15</sup> tetapi skala penglibatan masyarakat tempatan khususnya masyarakat Dusun yang berada di kawasan pedalaman hanyalah kecil.<sup>16</sup>

Hanya menerusi kehadiran Pretymen<sup>17</sup> yang dilantik sebagai residen Tempasuk pada tahun 1878, juga telah mengubah pelbagai aspek politik, sosial dan ekonomi di kawasan Tempasuk.<sup>18</sup> Dari aspek pentadbiran, Pretymen telah mengubah sistem pentadbiran tradisional kepada pentadbiran SBBUB. Beliau turut meletakkan pentadbir atau pemimpin tempatan mentadbir di kawasan kampung dengan memberi laporan kepada pihak pentadbir SBBUB setiap minggu. Pertemuan antara ketua pemimpin juga diadakan pada setiap minggu untuk berbincang tentang masalah yang dihadapi oleh penduduk. Beliau telah menubuhkan pusat pentadbiran di Genambur untuk memudahkan kawalan dan melawat tempat tersebut setiap pada hujung minggu.<sup>19</sup> Hal ini demikian kerana sebelum kedatangan Pretymen, sering berlaku permusuhan dan perpecahan antara masyarakat Dusun, Bajau Samah dan Iranun. Oleh itu, Pretymen telah mengadakan beberapa siri pertemuan dengan wakil pemimpin tempatan antara ketiga-tiga suku kaum di daerah ini untuk mengurangkan dan menghentikan konflik yang berlaku.<sup>20</sup> Beliau juga telah meletakkan enam orang polis untuk menjaga ketenteraman di Tempasuk.<sup>21</sup> Namun, usahanya tidak begitu

berkesan kerana penduduk tempatan yang tidak menghiraukan undang-undang pihak Inggeris yang dilaksanakan. Malahan, keadaan bertambah teruk kerana perbalahan antara masyarakat masih sering berlaku dan wujud penentangan masyarakat kepada pihak British. Akhirnya, pentadbiran di daerah ditinggalkan oleh pihak British begitu sahaja pada tahun 1879 sehinggalah pada tahun 1897.<sup>22</sup>

Pada tahun 1897, pihak British telah mengambil inisiatif untuk menduduki semula Tempasuk kerana tindakan sebahagian masyarakat Bajau yang menyokong Mat Salleh bagi menentang British dan membakar kediaman pegawai British di Ambong. Berikutan peristiwa itu, pihak British telah menempatkan beberapa orang polis dan tentera untuk mengawal daerah ini. Namun demikian, penentang daripada masyarakat tempatan yang sering berlaku dan sukar dikawal. Justeru, untuk mengawal tindak laku masyarakat di Tempasuk, pihak British telah melantik Ketua Anak Negeri di daerah ini untuk mentadbir tugas-tugas yang berkaitan dengan pentadbiran tempatan. Ketua Anak Negeri ini juga dipertanggungjawabkan untuk melantik wakil Ketua Anak Negeri bagi setiap suku kaum mengikut kampung di daerah ini. Pelantikan ini akhirnya meredakan sikap masyarakat untuk terus menentang pihak British kerana setiap wakil ini telah diberi tunjuk ajar untuk mengawal dan menyampaikan maklumat terhadap anak-anak buahnya.<sup>23</sup>

Situasi dan keadaan yang lebih awam secara tidak langsung telah memulihkan sistem ekonomi masyarakat tempatan di Tempasuk. Hubungan baik antara masyarakat tempatan membolehkan wujudnya kegiatan ekonomi perniagaan kecil yang lebih teratur dan sistematik.<sup>24</sup> Penglibatan ahli masyarakat di Tempasuk dalam perniagaan kecil bermula dengan aktiviti pertukaran barangan dengan sesama masyarakat tempatan lain telah berkembang setelah berlakunya pemusatan tempat perniagaan kecil yang lebih dikenali sebagai tamu.<sup>25</sup> Tamu ini adalah sangat penting bagi masyarakat tempatan di daerah ini kerana memberi kemudahan kepada penduduk kampung untuk menjual dan membeli hasil pertanian dan perikanan serta bagi mendapatkan keperluan harian. Terdapat beberapa tamu di daerah Kota Belud pada masa itu, iaitu:

**Jadual 1** Senarai lokasi tamu di Kota Belud

<b>Nama Tempat</b>	<b>Tahun Dibuka</b>
Tamu Genambur	1902
Tamu Timbang	1902
Tamu Obong (berdekatan dengan Tamu Kabidahan)	1902
Tamu Sayap	1903
Tamu Kabidahan	1904
Tamu Bambang	1902
Tamu Garanuntong (Ulu Ratau)	1902

Sumber: Diperoleh dan diubah suai daripada *Annual Report British North Borneo Herald British* dari tahun 1882-1920

Jadual 1 menyenaraikan tempat berjual beli bagi produk barangan tempatan. Didapati bahawa pada ketika itu terdapat tujuh buah tempat pertemuan utama masyarakat tempatan dengan masyarakat lain dan pedagang dari luar iaitu Tamu Genambur (Batu 10), Tamu Timbang, Tamu Obong, Tamu Sayap, Tamu Kabidahan, Tamu Bambang dan Tamu Garanutung. Kewujudan lokasi tamu ini membuktikan bahawa wujudnya aktiviti perniagaan secara kecil-kecilan dalam kalangan masyarakat tempatan dan pedagang dari luar. Setiap tamu ini akan diadakan pada tarikh dan masa berbeza agar tidak berlaku pertindihan jadual masa tersebut untuk memudahkan peniaga luar datang ke tamu. Setiap tamu ini juga mempunyai pelbagai keistimewaan dan keunikan yang berbeza menyebabkan pedagang-pedagang dari luar turut berkunjung di setiap ketujuh-tujuh tamu berkenaan.

Selain daripada Tamu Genambur, tempat lain yang banyak dikunjungi oleh pedagang luar adalah Tamu Sayap. Hal ini disebabkan permintaan yang tinggi daripada pedagang luar seperti damar dan rotan menyebabkan ramai pedagang luar datang ke tempat tersebut untuk mendapatkan produk tempatan. Kewujudan tempat perniagaan secara kecil-kecilan ini telah menyebabkan pedagang dari luar, terutamanya pedagang Cina telah membina lot-lot kedai<sup>26</sup> yang kecil berhampiran dengan tamu tersebut. Operasi kegiatan perniagaan di tamu ini biasanya dilakukan setiap dua kali dalam sebulan atau satu kali seminggu mengikut yang ditetapkan oleh pemimpin masyarakat. Selain daripada aktiviti berjual beli di tamu berkenaan, setiap pemimpin masyarakat juga akan bertemu di tempat tersebut untuk menjaga kegiatan perniagaan kecil yang ada dan seterusnya membincangkan masalah dan mencari jalan penyelesaian bagi mengatasi masalah dalam kalangan masyarakat mereka sendiri.<sup>27</sup>

### **Penglibatan Masyarakat Dusun dalam Perniagaan Kecil di Tamu**

Penglibatan masyarakat Dusun Kota Belud dalam perniagaan kecil pada awalnya bermula dengan keinginan untuk mendapatkan barangan keperluan daripada masyarakat tempatan yang lain. Antara faktor utama penglibatan mereka dalam perniagaan kecil adalah disebabkan kekurangan keperluan asas yang lain dalam kehidupan. Kebanyakan mereka tinggal di kawasan pedalaman dan hasil utama yang mereka peroleh adalah hasil pertanian, hasil sungai dan hasil laut. Hal ini disebabkan tempat tinggal mereka sangat mempengaruhi kegiatan ekonomi harian mereka. Sebagai contohnya, masyarakat Dusun yang tinggal di kawasan bukit dan lembah lebih tertumpu kepada kegiatan pertanian dan mencari hasil hutan, manakala bagi masyarakat Iranun dan Bajau yang tinggal di kawasan pesisir pantai lebih tertumpu kepada kegiatan ekonomi menangkap ikan dan kraf tangan. Walaupun hasil dapatan ini sememangnya mencukupi untuk menampung kehidupan seharian mereka, tetapi mereka masih memerlukan keperluan asas lain



yang dihasilkan oleh masyarakat tempatan sekitar yang lain seperti garam dan hasil laut. Sebagai contohnya, masyarakat Iranun terkenal dengan aktiviti jualan sarang burung dan hasil laut, masyarakat Bajau terkenal dengan jualan hasil laut dan penghasilan garam, manakala bagi masyarakat Dusun pula terkenal dengan jualan hasil pertanian seperti padi dan hasil hutan iaitu damar.<sup>28</sup>

Selain itu, faktor bencana alam<sup>29</sup> yang sering merosakkan tanaman pertanian menyebabkan masyarakat Dusun terpaksa keluar untuk mencari keperluan asas daripada masyarakat tempatan yang lain di daerah Kota Belud seperti mendapatkan keperluan asas daripada masyarakat Bajau atau masyarakat Iranun. Bencana alam seperti kemarau yang berpanjangan dan hujan yang berterusan banyak merosakkan hasil pertanian mereka sehingga tidak membuahkan hasil. Demikian juga, faktor hujan yang berpanjangan menyukarkan mereka untuk masuk ke dalam hutan untuk mencari hasil hutan bagi kelangsungan hidup. Keadaan bencana alam ini banyak memusnahkan tanaman yang mereka usahakan sehingga tidak membuahkan hasil yang mencukupi. Hal ini pernah berlaku sekitar tahun 1905, iaitu kemarau yang berpanjangan menyebabkan tanaman padi yang ditanam oleh masyarakat Dusun telah rosak.<sup>30</sup> Kekurangan hasil pertanian ini menyebabkan mereka terpaksa bergantung dengan masyarakat lain untuk mendapatkan keperluan asas yang lain. Pada awalnya, kegiatan aktiviti mereka dimulai dengan aktiviti bertukar barangan keperluan asas sahaja. Namun, kegiatan pertukaran barangan ini telah berubah menjadi satu kegiatan perniagaan kecil apabila wujudnya penggunaan sistem mata wang yang diperkenalkan oleh SBBUB. Hal ini dapat mengatasi masalah pertukaran barang tidak serentak dalam kalangan peniaga tersebut.



**Foto 1** Masyarakat Dusun sedang berinteraksi antara satu sama lain di tamu  
Sumber: Koleksi gambar Arkib Negeri Sabah

Faktor ketiga penglibatan masyarakat Dusun dalam perniagaan kecil ini adalah disebabkan masa lapang. Masa lapang ini juga menjadi antara penyebab penglibatan mereka dalam perniagaan kecil. Hal ini disebabkan apabila tiba musim menunggu hasil pertanian mereka untuk dituai, mereka mempunyai masa yang panjang untuk berehat dan berinteraksi dengan masyarakat lain. Ia merupakan salah satu cara untuk mengisi masa lapang mereka. Berdasarkan Foto 1, jelas memperlihatkan bahawa masyarakat ini sedang duduk bercerita dengan rakan-rakan mereka di tamu yang merupakan salah satu aktiviti lazim yang dilakukan setelah aktiviti berjual beli dijalankan di tamu. Ada kalanya, mereka akan menetapkan satu tarikh khusus untuk bertemu dan akhirnya melakukan kegiatan perniagaan secara kecil-kecilan dengan kaedah berinteraksi sambil menjual hasil pertanian yang ada. Malah, terdapat sebahagian masyarakat Dusun yang menjadikan tamu sebagai tempat untuk berhibur. Hal ini demikian kerana suasana tamu yang selalu diserikan alunan dan persembahan muzik tradisional yang dipersembahkan secara tidak langsung oleh peniaga yang menjual peralatan muzik tradisional seperti gong, gendang dan kulintangan.



**Foto 2** Suasana kegiatan perniagaan kecil di tamu  
Sumber: Koleksi gambar Arkib Negeri Sabah

Foto 2 di atas menunjukkan tentang kegiatan perniagaan yang dijalankan pada peringkat awal pembabitan masyarakat Dusun di Tamu semasa penjajahan Syarikat Berpiagam Borneo Utara. Melalui foto di atas, dapat kita perhatikan bahawa tamu berkenaan telah dibina di sebuah kawasan tanah lapang bagi memudahkan urus niaga tersebut dijalankan. Terdapat juga beberapa pondok kecil yang telah disediakan sebagai gerai untuk tempat mereka menjalankan perniagaan. Namun demikian, ada juga dalam kalangan masyarakat Dusun ini yang hanya menjalankan perniagaan tanpa gerai yang dibina oleh mereka.

Tuntasnya, tamu merupakan pusat pertemuan ahli masyarakat tempatan khususnya masyarakat Dusun untuk pelbagai aktiviti. Pada peringkat awal penglibatan masyarakat Dusun di tamu, mereka tidak mempunyai tempat yang khusus untuk berjual beli dan mereka hanya akan duduk di tempat yang lapang untuk menjual hasil pertanian dan perikanan mereka. Namun demikian, setelah satu tempoh masa, terdapat segelintir peniaga kecil Dusun mula membina pondok khas untuk menjalankan kegiatan perniagaan mereka secara rutin.

Faktor keempat, kedatangan pedagang luar juga merupakan salah satu faktor penarik masyarakat Dusun terlibat dalam perniagaan kecil. Hubungan perdagangan di antara China dengan Borneo mahupun Sulu dan Jolo telah lama berlaku sebelum abad ke-18 untuk mendapatkan hasil dagangan seperti *camphor*, trepang, mutiara, agar-agar, cangkerang kura-kura, sarang burung dan sebagainya. Barang dagangan tersebut mendapat permintaan yang tinggi di China dan boleh didapati dalam perjalanan mereka melalui Labuan, Brunei dan Singapura, manakala pedagang daripada China membawa barang dagangan seperti tekstil, tembikar, gangsa, pakaian dan sebagainya. Pada awalnya pedagang dari luar seperti pedagang Cina, Arab, Sulu dan Brunei telah datang ke Utara Borneo untuk mendapatkan hasil hutan.<sup>31</sup> Antara hasil tempatan yang sangat terkenal menjadi permintaan utama pedagang dari luar adalah rotan, damar, sarang burung, kentang dan ikan masin.<sup>32</sup> Keadaan ini akhirnya menyebabkan masyarakat tempatan menyediakan keperluan yang diminta oleh pedagang tersebut dan terlibat secara tidak formal dalam kegiatan perniagaan kecil. Permintaan pedagang luar ini menyebabkan mereka cuba untuk menanam beberapa jenis tanaman yang lain seperti tembakau, tebu dan padi. Hal ini disebabkan British melihat keadaan tanah di Kota Belud pada ketika tersebut subur, mempunyai tanah lapang yang sesuai untuk menanam tanaman yang lain untuk dikomersialkan. Permintaan yang tinggi ini menyebabkan harga jualan hasil hutan ini terus meningkat. Sebagai contoh, jadual berikut merupakan hasil penjualan damar yang sentiasa meningkat dalam tempoh setahun.

**Jadual 2** Perubahan harga jualan hasil hutan (damar)

Bulan	Harga Jualan (Dollar)	Kuantiti
Mac 1904	1.50	1 pikul
Jun 1904	3.00	1 pikul
Disember 1904	5.00	1 pikul

Sumber: Diubah suai dan diperolehi daripada laporan tahunan *British North Borneo Herald* pada tahun 1904

Jadual 2 menunjukkan bahawa terdapat perubahan harga jualan hasil hutan oleh masyarakat Dusun di daerah pedalaman pada tahun 1904. Hasil hutan ini biasanya terdapat di Tamu Genambur dan Tamu Sayap sahaja. Permintaan yang tinggi terhadap hasil hutan (damar) menyebabkan harga jualan ini meningkat dalam tempoh setahun, iaitu pada awalnya damar hanya dijual dalam harga 1.50 dollar 1 pikul. Walau bagaimanapun, harga jualan ini meningkat kepada 3 dollar 1 pikul dan akhirnya menjadi harga pasaran kepada 5 dollar 1 pikul. Kualiti hasil hutan yang baik ini menyebabkan ramai pedagang China datang ke tamu untuk mendapatkan barangan tempatan. Permintaan yang tinggi daripada pedagang China pada ketika itu telah meningkatkan harga pasaran damar dan seterusnya menjadikan damar sebagai salah satu produk hasil tempatan yang mendapat permintaan ramai oleh pedagang dari luar.

### **Peranan Pemimpin Masyarakat dalam Perniagaan Kecil**

Kepesatan kegiatan perniagaan kecil yang dijalankan di tamu menyebabkan campur tangan pemimpin masyarakat dan pentadbir British. Hal ini disebabkan kedatangan pedagang dari luar untuk mendapatkan hasil tempatan memerlukan suatu tadbir urus yang lebih teratur.<sup>33</sup> Salah satu peranan dan inisiatif pemimpin masyarakat dalam perniagaan di tamu adalah penetapan tempat yang khas untuk berjumpa dengan pedagang luar dan masyarakat lain bagi menjalankan kegiatan perniagaan kecil. Demikian juga penetapan dari segi tempoh masa bagi mengadakan tamu iaitu sama ada sebulan sekali atau seminggu sekali.

Selain itu, para pemimpin masyarakat juga bertanggungjawab dalam memastikan kegiatan urus niaga di tamu berjalan lancar dan selamat. Hal ini disebabkan terdapat kes tertentu seperti kecurian dan huru-hara dicetuskan oleh para pengunjung tamu.<sup>34</sup> Malah, pemimpin masyarakat juga bertanggungjawab untuk mendengar dan mengatasi sebarang masalah yang timbul dalam kalangan masyarakat di tamu.<sup>35</sup> Oleh itu, terdapat satu kawasan atau sudut khas di kawasan tamu yang dikenali sebagai tempat pengadilan atau mahkamah adat bagi menyelesaikan pelbagai masalah tingkah laku masyarakat tempatan. Kawasan tersebut akan menjadi tempat oleh semua wakil atau pemimpin masyarakat untuk berbincang dan perbincaraan bagi menentukan kaedah penyelesaian bagi sebarang masalah yang melibatkan adat istiadat. Berikut merupakan senarai ketua masyarakat yang dilantik sebagai pemimpin masyarakat pada ketika itu.

**Jadual 3** Senarai nama pemimpin masyarakat tempatan di Tempasuk (Kota Belud)

Bil	Nama	Jawatan
1	Orang Kaya-kaya Arsad	Ketua Masyarakat Bajau
2	Lingkok	Ketua Masyarakat Dusun Tempasuk
3	Gunting	Ketua Masyarakat Dusun Kiau-Genambur

Sumber: Diubah suai daripada *British North Borneo Herald* 1881-1920

Berdasarkan Jadual 3, dapat disimpulkan bahawa pelantikan ketua masyarakat ini membolehkan urusan kehidupan masyarakat terutamanya dari segi permasalahan kaum dapat diselesaikan. Peranan pemimpin masyarakat adalah sangat penting dalam menjaga dan mengatur kehidupan masyarakat pada ketika tersebut. Selain itu, pemimpin masyarakat merupakan antara pengantara dengan pihak pentadbir British tentang maklumat yang disampaikan kepada penduduk tempatan masing-masing. Selain daripada masalah sosial tempatan yang berlaku seperti melakukan huru-hara, mencuri dan berkelakuan tidak sopan. Walau bagaimanapun, kadangkala keadaan huru-hara juga sering berlaku di kawasan tamu. Justeru, pada 16 Disember 1904, atas inisiatif pemimpin tempatan, mereka telah meminta bantuan daripada pihak SBBUB untuk mengawal keadaan di tamu tersebut.<sup>36</sup>

### **Penglibatan SBBUB dalam Perniagaan Kecil di Tempasuk**

Penglibatan pihak SBBUB terhadap kegiatan ekonomi di tamu telah menimbulkan pelbagai reaksi yang berbeza dalam kalangan masyarakat tempatan. Misalnya, sebahagian besar masyarakat Bajau yang tidak mahu menerima perubahan yang dilakukan oleh SBBUB. Mereka melihat penglibatan SBBUB telah menyebabkan mereka kehilangan kuasa untuk mentadbir di Tempasuk. Namun, pada perspektif masyarakat Dusun pula, mereka menyokong penglibatan SBBUB kerana dapat mengatasi masalah huru-hara yang sering berlaku.

Langkah pertama yang dilakukan SBBUB adalah dengan menguatkuasakan undang-undang dalam kalangan masyarakat setempat. Malah, pihak SBBUB meletakkan pihak polis untuk mengawal kawasan tempat tersebut bagi mengelakkan huru-hara.<sup>37</sup> Pengenalan undang-undang dan tindakan bagi sebarang juga akan diumumkan di tamu adalah sebagai satu pengajaran kepada masyarakat lain, manakala untuk kesalahan kes yang berat pula, hukuman penjara akan dikenakan mengikut kategori kesalahan. Kesannya, telah berlaku perkembangan yang baik dalam aktiviti perniagaan kecil di tamu.<sup>38</sup>

Selain itu, SBBUB juga telah menjadikan tamu sebagai medium penyebaran maklumat yang ingin disampaikan oleh pihak SBBUB kepada masyarakat tempatan.<sup>39</sup> Hal ini disebabkan maklumat akan mudah tersebar kerana pihak

British hanya akan menampal notis di kawasan tamu kerana mudah dibaca dan seterusnya disebar kepada pihak umum. Keadaan ini memudahkan pihak British untuk menyebarkan apa-apa maklumat yang ingin disampaikan kepada pihak setempat tanpa perlu melalui ketua masyarakat mereka.

Penglibatan SBBUB dalam aktiviti perniagaan kecil di Tempasuk juga berjaya mengatasi beberapa masalah asas yang dihadapi oleh para peniaga kecil di tamu.<sup>40</sup> Salah satu masalah yang dihadapi adalah masalah kecurian binatang ternakan seperti kerbau dan lembu.<sup>41</sup> Keadaan ini telah menyukarkan peniaga kecil khususnya masyarakat Dusun kerana lembu dan kerbau digunakan sebagai pengangkutan utama untuk bergerak ke tamu.<sup>42</sup> Masalah kecurian ini juga sering dikaitkan dengan masalah tingkah laku sekelompok masyarakat setempat yang tidak mendengar arahan dan tidak berdisiplin. Namun demikian, masalah ini telah berjaya diatasi oleh pihak SBBUB selepas penahanan pencuri tersebut dan dihukum penjara di penjara Sandakan.<sup>43</sup>

Masalah kedua ialah penetapan kadar harga barangan yang diniagakan yang terlalu mudah dan dianggap tidak berkualiti.<sup>44</sup> Hal ini menyebabkan pedagang dari luar seperti pedagang Brunei dan China membeli barangan mereka dengan harga yang lebih rendah daripada pasaran semasa. Perkara ini pernah berlaku apabila masyarakat Dusun membawa hasil hutan mereka seperti rotan yang dibeli dengan harga 5 dollar per pikul walhal harga pasaran semasa adalah 7.50 dollar per pikul. Perkara ini adalah disebabkan kualiti hasil hutan mereka adalah kurang disebabkan rotan yang dijual adalah sangat kecil, tidak matang dan kurang berkualiti. Namun, masalah ini telah diatasi melalui mesyuarat bersama pemimpin masyarakat di Jesselton dalam usaha menetapkan harga barangan di tamu. Hasil perbincangan tersebut, akhirnya mereka bersetuju bahawa setiap harga barangan tempatan yang ada di tamu perlu diselaraskan mengikut keputusan mesyuarat tersebut. Contohnya harga jualan padi dijual mengikut harga pasaran iaitu 2½ sen bagi 1 gantang dan \$1.00 bagi 40 gantang.<sup>45</sup> Selain itu, pentadbir tempatan juga telah menetapkan cukai bagi minuman tapai dengan harga cukai 6 sen bagi 1 gantang dan harga 25 sen bagi bayaran setahun. Penetapan harga barangan di tamu ini memudahkan pengawalan harga barangan tempatan serta mengelakkan penindasan kepada para peniaga kecil masyarakat Dusun.

Masalah ketiga adalah berkaitan dengan masalah pengangkutan yang menyebabkan kekangan kegiatan perniagaan kecil pada ketika itu. Hal ini disebabkan belum wujud lagi sistem pengangkutan secara sistematik oleh pihak SBBUB. Peniaga tempatan terpaksa berjalan kaki dengan mengambil masa lima sehingga 10 jam daripada kawasan kampung ke tamu.<sup>46</sup> Hal yang sama juga berlaku bagi masyarakat Dusun yang tinggal di daerah luar seperti

Tambunan dan Ranau. Mereka akan mengambil masa sekurang-sekurangnya dua hingga empat hari untuk sampai ke tempat mereka berjual beli. Bagi mengatasi masalah ini, masyarakat setempat akan menggunakan jalan melalui jalan sungai. Namun, keadaan banjir yang deras boleh menghanyutkan sampan-sampan tersebut sehingga menyebabkan kehilangan nyawa. Masalah pengangkutan ini sering berlaku, terutama bagi pedagang luar dan tempatan yang ingin berkunjung ke Tamu Genambur kerana lokasi tamu ini terletak jauh ke kawasan pedalaman Kota Belud (ulu Sungai Tempasuk). Namun demikian, usaha pentadbir SBBUB dengan memperbaiki jalan raya di Tempasuk yang menghubungkan antara kawasan kampung dengan tamu.<sup>47</sup> Pegawai daerah SBBUB ini juga akan memantau perkembangan pembuatan jalan raya yang dibina pada setiap dua kali sebulan. Jalan raya ini dibina oleh banduan yang ditahan oleh pihak SBBUB kerana melakukan pelbagai jenis kesalahan.

Masalah keempat adalah berkaitan penularan wabak penyakit dalam kalangan peniaga kecil tempatan di tamu. Misalnya, wabak penyakit kolera pada tahun 1905 yang telah meragut nyawa banyak orang.<sup>48</sup> Hal ini diburukkan dengan tindakan dan sikap masyarakat tempatan menolak vaksin yang disediakan oleh pentadbir SBBUB telah menyebabkan wabak penyakit ini lebih cepat menular. Malah, pada tahun 1919, wujud lagi satu penyakit global yang baharu iaitu simptom demam, sesak nafas dan batuk.<sup>49</sup> Keadaan ini menyebabkan aktiviti jual beli di tamu tidak dapat dilakukan kerana ramai pedagang dari luar tidak datang berdagang ke tempat tersebut bagi mengelakkan penularan wabak penyakit berjangkit tersebut. Kekurangan para pedagang dari luar menyebabkan aktiviti perniagaan kecil hanya dalam kalangan masyarakat tempatan sahaja tanpa dikunjungi oleh pedagang-pedagang dari luar.<sup>50</sup> Tindakan dan langkah yang diambil oleh SBBUB untuk memastikan ahli masyarakat menerima vaksin adalah dengan meminta bantuan daripada pemimpin tempatan untuk menerangkan kepada masyarakat agar menerima vaksin tersebut untuk mencegah penularan wabak penyakit.<sup>51</sup>

Tuntasnya, penglibatan pihak SBBUB dalam kegiatan perniagaan kecil di tamu, Tempasuk telah menyebabkan peningkatan ekonomi. Pelbagai masalah yang timbul sebelum ini semasa di bawah penglibatan pemimpin tempatan telah berjaya diatasi. Kegiatan ekonomi perniagaan kecil khususnya daripada masyarakat Dusun di tamu telah menjadi asas kepada perkembangan ekonomi di Tempasuk.

## Kesimpulan

Perkembangan perniagaan kecil oleh masyarakat Dusun di daerah Kota Belud (dahulunya dikenali sebagai Tempasuk) bermula sebelum campur tangan British 1881 – 1905 dan akhirnya diletakkan di bawah pihak SBBUB pada tahun 1905. Hal ini disebabkan sebagai satu usaha untuk membantu masyarakat setempat untuk menjalankan perniagaan kecil dengan lebih lancar. Campur tangan pihak British ini juga membawa pelbagai kesan kepada kemajuan perkembangan perniagaan kecil ini kerana mereka membantu mengelakkan huru-hara, kecurian, penetapan harga jualan dan pemberontakan yang sering berlaku pada ketika itu. Walaupun dilihat bahawa aktiviti perniagaan kecil di tamu ini mengalami turun naik seperti kekurangan pengunjung dari luar. Namun, masyarakat Dusun di Kota Belud tetap menjalankan kegiatan perniagaan kecil mereka. Keuntungan bukanlah matlamat utama masyarakat Dusun menjalankan perniagaan kecil namun mereka lebih kepada ingin menjalinkan hubungan silaturahim dengan masyarakat lain serta nilai rasa tanggungjawab untuk berkongsi lebih kepada orang lain. Sifat masyarakat yang mementingkan kelangsungan hidup menyebabkan aktiviti perniagaan kecil ini terus berkembang pada ketika itu.

## Nota

- <sup>1</sup> Owen Rutter, *The Pagans of North Borneo*, California: Hutchinson & Company, 1929.
- <sup>2</sup> Tina Rimmer, *The Tamparuli Tamu: A Sabah Market*, Kota Kinabalu: The Sabah Society, 1999.
- <sup>3</sup> Chong Han San dan Low Ai Fuah, *The Tamu: Sabah's Native Market*, Kota Kinabalu: Opus Publication, 2008.
- <sup>4</sup> K.G. Tregonning, *Under Chartered Company Rule: North Borneo (1881-1946)*, Kuala Lumpur: University of Malaya, 2007.
- <sup>5</sup> Johan M. Padasian, *Cultural Progress and The Arts*, dalam, Anwar Sullivan dan Cecilia Leong, (Peny.), *Commemorative History of Sabah, 1881-1981*, Sabah State Government: Centenary Publication Committee, 1981.
- <sup>6</sup> Yap Beng Liang, *Politik dan Ekonomi Masyarakat Bajau Kota Belud Sabah*, Kuala Lumpur: Akademi Pengajian Melayu, Universiti Malaya, 2001, hlm. 25.
- <sup>7</sup> Walau bagaimanapun, keadaan banjir yang sering melanda kawasan tersebut kerana berhampiran dengan Sungai Tempasuk telah menyebabkan pihak British berpindah ke kawasan tanah tinggi di Kota Belud. Lihat, D.S Ranjit Singh, *The Making of Sabah: The Dynamics of Indigenous Society*, Kota Kinabalu: Jabatan Ketua Menteri, hlm. 66.
- <sup>8</sup> Razali Goroh, *Adat Istiadat Dusun Kota Belud*, Kota Kinabalu: Jabatan Muzium dan Arkib Sabah, 1986, hlm. 81.
- <sup>9</sup> D.S Ranjit Singh, *The Making of Sabah: The Dynamics of Indigenous Society*, hlm. 66.
- <sup>10</sup> Chong Han San dan Low Ai Fuah, *The Tamu: Sabah's Native Market*, hlm. 21.
- <sup>11</sup> Peter Spence Gudgeon, *Economic Development in Sabah 1881-1981*, Dlm. Anwar Sullivan dan Cecilia Leong, (Peny.), *Commemorative History of Sabah, 1881-1981*, Kota Kinabalu: Sabah State Government Centenary, hlm. 183.
- <sup>12</sup> Ibid.
- <sup>13</sup> James Francis Warren, *The Global Economy and The Sulu Zone: Connections, Commodities and Culture*, UU University Press: Amsterdam, 2000, hlm. 21.
- <sup>14</sup> Peter Spence Gudgeon, *Economic Development in Sabah 1881-1981*, hlm. 184.
- <sup>15</sup> *British North Borneo Herald*, 1 Mei 1884, hlm. 31.
- <sup>16</sup> Ivor H. Evans, *Among Primitive Peoples in Borneo*. London: Seeley Service, 1922, hlm. 22.



- <sup>17</sup> D.S Ranjit Singh, *The Making of Sabah: The Dynamics of Indigenous Society*, hlm. 121.
- <sup>18</sup> Pentadbiran di Kota Belud diambil oleh SBBUB dan William Pretymen merupakan Residen Inggeris yang pertama di Tempasuk bermula dari tahun 1878 hingga 1880. Beliau tiba di kawasan Tempasuk dengan mengikuti laluan dari Kuala Abai pada 2 Mei 1878. Ibid.
- <sup>19</sup> Ibid., hlm. 124.
- <sup>20</sup> Ibid., hlm. 121.
- <sup>21</sup> Ibid.
- <sup>22</sup> Arkib Negeri Sabah, Kota Belud Sepintas lalu, hlm. 1.
- <sup>23</sup> Ibid., hlm. 1.
- <sup>24</sup> Ibid., hlm. 2.
- <sup>25</sup> Johan M. Padasian, *Cultural Progress and The Arts*, hlm. 533.
- <sup>26</sup> *British North Borneo Herald*, 1 Oktober 1902, hlm. 338.
- <sup>27</sup> Chong Han San dan Low Ai Fuah. *The Tamu: Sabah's Native Market*, hlm. 2.
- <sup>28</sup> *British North Borneo Herald*, 2 Mac 1904, hlm. 119.
- <sup>29</sup> *British North Borneo Herald*, 1 Mei 1884, hlm. 31.
- <sup>30</sup> *British North Borneo Herald*, 1 Februari 1905, hlm. 33.
- <sup>31</sup> *British North Borneo Herald*, 1 Mei 1884, hlm. 31.
- <sup>32</sup> Chong Han San & Low Ai Fuah, *The Tamu: Sabah's Native Market*, hlm. 22.
- <sup>33</sup> Ibid., hlm. 22.
- <sup>34</sup> *British North Borneo Herald*, 1 September 1902, hlm. 297.
- <sup>35</sup> Chong Han San dan Low Ai Fuah. *The Tamu Sabah's Native Market*, hlm. 24.
- <sup>36</sup> *British North Borneo Herald*, 16 Disember 1904, hlm. 303.
- <sup>37</sup> Arkib Negeri Sabah, Kota Belud Sepintas lalu, hlm. 1
- <sup>38</sup> Ibid., hlm. 2
- <sup>39</sup> Chong Han San dan Low Ai Fuah, *The Tamu Sabah's Native Market*, hlm. 23.
- <sup>40</sup> *British North Borneo Herald*, 2 Disember 1904, hlm. 292.
- <sup>41</sup> *British North Borneo Herald*, 1 September 1902, hlm. 298.
- <sup>42</sup> Pada sisi lain pula, kewujudan lembu dan kerbau yang tidak dikawal di kawasan tamu yang kadangkala boleh menimbulkan keadaan huru-hara. Lihat *British North Borneo Herald*, 1 Ogos 1902, hlm. 256.
- <sup>43</sup> Gumpok dari Bangkahak telah didapati mencuri kerbau-kerbau penduduk kampung sekitar. Beliau telah ditahan bersama dengan empat rakan lain (Mahun. Sioh, Godann dan Salleh) semasa sedang mencuri kerbau di Kampung Kaguraan. Beliau bersama rakannya telah dikenakan hukuman penjara selama dua tahun di penjara Sandakan. Lihat, *Fail Secretariat British North Borneo Herald*, 31 Mac 1919, No. rujukan: R.O.W.C 1156/18.
- <sup>44</sup> *British North Borneo Herald*, 17 September 1906, hlm. 179.
- <sup>45</sup> *Fail secretariat British North Borneo Herald*, 6 April 1936. No. rujukan: R.O.W.C 84/36/18.
- <sup>46</sup> *British North Borneo Herald*, 1 Ogos 1905, hlm. 166.
- <sup>47</sup> *British North Borneo Herald*, 1 April 1905, hlm. 78.
- <sup>48</sup> *British North Borneo Herald*, 1905, hlm. 166.
- <sup>49</sup> *British North Borneo Herald*, 1 April 1919, hlm. 70.
- <sup>50</sup> Ibid., hlm. 70.
- <sup>51</sup> *British North Borneo Herald*, 1 Ogos 1905, hlm. 166.

## Senarai Rujukan

### Dokumen Arkib

Arkib Negeri Sabah, Kota Belud Sepintas lalu.  
*British North Borneo Herald*, 1 Mei 1884.  
*British North Borneo Herald*, 1 Oct 1902.  
*British North Borneo Herald*, 1 Ogos 1902  
*British North Borneo Herald*, 1 September 1902.  
*British North Borneo Herald*, 2 Mac 1904.

- British North Borneo Herald*, 2 Disember 1904.  
*British North Borneo Herald*, 16 Disember 1904.  
*British North Borneo Herald*, 1 Feb 1905.  
*British North Borneo Herald*, 1 April 1905.  
*British North Borneo Herald*, 1 Ogos 1905.  
*British North Borneo Herald*, 17 September 1906.  
*British North Borneo Herald*, 1 April 1919.  
Fail secretariat *British North Borneo Herald*, 31 Mac 1919.  
Fail secretariat *British North Borneo Herald*, 6 April 1936.

### **Buku**

- Chong Han San & Low Ai Fung. (2008). *The Tamu: Sabah's Native Market*. Kota Kinabalu: Opus Publication.
- D.S Ranjit Singh. (2000). *The Making of Sabah: The Dynamics of Indigenous Society*. Kota Kinabalu: Jabatan Ketua Menteri.
- Ivor H. Evans. (1922). *Among Primitive Peoples in Borneo*. London: Seeley Service.
- James Francis Warren. (2000). *The Global Economy and The Sulu Zone: Connections, Comodities and Culture*. Amsterdam: UU University Press.
- Johan M. Padasian. (1981). *Cultural Progress and The Arts*. Dlm. Anwar Sullivan dan Cecilia Leong. (Peny.). *Commemorative History of Sabah, 1881-1981*. Sabah State Government: Centenary Publication Committee.
- K.G. Tregonning. (2007). *Under Chartered Company Rule: North Borneo (1881-1946)*. Kuala Lumpur: University of Malaya.
- Owen Rutter. (1929). *The Pagans of North Borneo*. California: Hutchinson & Company.
- Peter Spence Gudgeon. (1981). *Economic Development in Sabah 1881-1981*. Dalam, Anwar Sullivan dan Cecilia Leong (Peny.). *Commemorative History of Sabah, 1881-1981*. Kota Kinabalu: Sabah State Government Centenary.
- Razali Goroh. (1986). *Adat Istiadat Dusun Kota Belud*. Kota Kinabalu: Jabatan Muzium dan Arkib Sabah.
- Tina Rimmer. (1999). *The Tamparuli Tamu: A Sabah Market*. Kota Kinabalu: The Sabah Society.
- Yap Beng Liang. (2001). *Politik dan Ekonomi Masyarakat Bajau Kota Belud Sabah*. Kuala Lumpur: Akademi Pengajian Melayu, Universiti Malaya.